



Komunikado di prensa

20 di yùni 2024

Cft: Stipulá modifikashon presupuestario 2024 mas pronto posibel

Philipsburg – Riba 14 di mei 2024, Sint Maarten a stipulá e presupuesto pa 2024. Esaki ta kasi seis luna despues di e deadline di 15 di desèmber 2023. Kolegio di supervishon finansiero Kòrsou i Sint Maarten (Cft) ta preokupá pa e kalidat di e presupuesto, i ta urgi e pais pa rekonsiliá esaki mas pronto posibel ku e normanan stipulá den Lei di Reino Supervishon Finansiero Kòrsou i Sint Maarten (Rft). Asina a stipulá e modifikashon presupuestario aki, e pais por kontratá un fiansa pa e invershonnan nesesario.

Cft tin añanan largu ta ekspresá su preokupashon tokante di e retraso struktural ku tin den e entrega di e presupuestonan stipulá. Debí na e desaroyonan polítiko resiente, e proseso presupuestario pa 2024 ta keda ainda mas atrasá. Aktualmente, e pais ta trahando riba un modifikashon presupuestario pa 2024. Cft ta enfatisá e importansia di finalisá e proseso aki mas pronto posibel. Ademas, e pais mester implementá e plannan di enfoke redaktá anteriormente, pa mehora di e proseso presupuestario. Lo mester prepará e proyekto presupuestario 2025 na tempu.

Fiansa pa invershonnan

Na 2024, Sint Maarten ke kontratá un fiansa pa konstrukshon di un prizòn nobo i trabounan di mantenshon di kareteranan. Tanten ku e presupuesto 2024 no ta kumpli ku e normanan di e Rft, e pais no por kontratá fiansanan mediante e inskripshon koriente serka Hulanda. Cft a pidi Sint Maarten pa entregá un modifikashon di proyekto presupuestario ku ta kumpli ku e normanan aki promé ku 1 di yùli 2024.

Reformanan Servisio di Impuesto

Cft ta konsiderá di sumo importansia ku ta modernisá e sistema di impuesto i e Servisio di Impuesto di Sint Maarten. Aktualmente, e Servisio di Impuesto ta lucha ku escases di personal i problemanan operashonal grandi. Entre otro pa e motibu aki, e ingresonan di impuesto ta ménos kompará ku e kresemento ekonómiko. Cft ta antisipá ku e pais lo por oumentá signifkamentemente e ingresonan di impuesto riba término kòrtiku. Den e marko ei, Cft ta enfatisá ku ta importante pa Servisio di Impuesto i sobrá instansianan, manera Audit Team Sint Maarten, pa tene mas kontrolnan. Na momentu ku e realisashon di ingresonan di impuesto ta bira mas haltu, Sint Maarten lo tin mas espasio den e presupuesto pa inisiativanan (di maneho) i invershonnan nobo.

Fondonan di kuido i fondonan sosial

E défisitnan serka e fondonan di kuido i fondonan sosial ta oumentá. Pa e periodo 2024 te ku 2030, e pronóstiko di Uitvoeringsorgaan Sociale en Ziektekosten Verzekeringen (SZV) ta mustra ANG 174 mion na défisitnan adisional serka e fondonan di kuido. Te awe, Sint Maarten no a implementá suficiente reformanan pa redusí strukturalmente e défisitnan aki. Si e pais no ta tuma medidanan, Cft ta antisipá ku riba término largu, esaki lo tin un impakto grandi riba e presupuesto nashonal di Sint Maarten.

[Fin di komunikado di prensa]



Foto:

Cft

Teksto pa foto:

Cft ta konsiderá di sumo importansia ku ta modernisá e sistema di impuesto i e Servisio di Impuesto di Sint Maarten.

Nota pa e redakshon – no publiká

Persona di kontakto di Cft:

Sekretariado di Kolegianan di supervishon finansiero
Telefòn +5999 461-9081 / +5999 461-9082 / +5999 461-9084
Koreo elektróniko info@cft.cw
Wèpsait www.cft.cw

Kontaktonan di prensa:

Jefka Alberto
Telefòn +5999 512-6861